

Bosna i Hercegovina
FEDERACIJA BOSNE I HERCEGOVINE
EKONOMSKO - SOCIJALNO VIJEĆE ZA TERITORIJU FEDERACIJE BiH

Broj: 03-30/14-6/25
Sarajevo, 03.02.2025. godine

Z A P I S N I K

sa V. sjednice Ekonomsko-socijalnog vijeća za teritoriju Federacije Bosne i
Hercegovine, održane dana 03.02.2025. godine u 10.00 sati

Sjednicom predsjedava dr. sc. Safudin Čengić, predsjednik Ekonomsko - socijalnog vijeća za teritoriju Federacije BiH

Na početku sjednice, predsjednik je konstatovao da sjednici prisustvuje 22 člana Ekonomsko-socijalnog vijeća za teritoriju Federacije Bosne i Hercegovine i to:

PREDSTAVNICI VLADE FEDERACIJE BiH:

Nermin Nikšić, Vojin Mijatović, Adnan Delić, Toni Kraljević, Vedran Lakić i Kemal Hrnjić, članovi delegacije Vlade FBiH.

PREDSTAVNICI UDRUŽENJA POSLODAVACA U FEDERACIJI BiH:

Adnan Smailbegović, Mario Nenadić, Senad Džambić, Zoran Gazibarić, Venan Hadžiselimović, Josip Kraljević i Snježana Köpruner, članovi delegacije Udruženja poslodavaca FBiH.

PREDSTAVNICI SINDIKATA:

Fikret Alić, Selvedin Šatorović, Saša Živković, Berislav Babić, Samir Kurtović, Mirza Hadžiabdić, Mevludin Bektić i Almir Salihović, članovi delegacije Sindikata.

Sjednici nisu prisustvovali:

Nediljko Rimac, član delegacije Vlade FBiH.

Pored prisutnih članova, sjednici Ekonomsko - socijalnog vijeća za teritoriju Federacije Bosne i Hercegovine (u daljem tekstu: ESV) prisustvovali su članovi Stručne službe te saradnici Tonija Kraljevića, federalnog ministra finansija i Nermina Nikšića, premijera FBiH.

Nakon uvodnog izlaganja predsjednik ESV isti je predložio Dnevni red:

1. Usvajanje zapisnika sa IV. redovne sjednice Ekonomsko-socijalnog vijeća za teritoriju Federacije BiH održane dana 22.01.2025. godine;
2. Prijedlozi mjera i pravnih akata Vlade FBiH vezano za obračun i isplatu minimalne plate, te kriterija za refundaciju ili sufinansiranja doprinosa shodno Odluci o minimalnoj plati za 2025. godinu;
3. Tekuća pitanja.

Predloženi Dnevni red jednoglasno je usvojen.

Ad. 1

Zapisnik sa IV. sjednice ESV održane dana 22.01.2025. godine, uz poziv za sjednicu, prethodno je dostavljen svim članovima.

Imajući u vidu da nije bilo primjedbi na predloženi tekst zapisnika, isti je jednoglasno usvojen.

Ad. 2

Uvodne napomene za ovu tačku Dnevnog reda dao je predsjednik ESV. U obraćanju prisutnim članovima naveo je da je zaključak sa prošle sjednice ESV da Vlada FBiH pripremi i dostavi konkretne prijedloge mjera kojima bi se poslodavcima olakšalo provođenje Odluke o iznosu najniže plaće za 2025. godinu, te je predložio da uvedne napomene za dvije uredbe koje je pripremila Vlada Federacije Bosne i Hercegovine, predstavi Nermin Nikšić, premijer Federacije BiH, i to za sljedeće uredbe:

- Uredba o isplati pomoći radnicima od strane poslodavaca,
- Uredba o mjerama finansijske pomoći privatnim poslodavcima, obrtima i ostalim samostalnim djelatnostima u Federaciji Bosne i Hercegovine u cilju održavanja radnih mjesta za 2025. godinu.

Nermin Nikšić, član delegacije Vlade FBiH, na početku je kazao da se, u prethodnom periodu, intenzivno radilo na pripremi uredbi koje će biti predstavljene danas, te da je Uredba o isplati pomoći radnicima od strane poslodavaca, relativno brzo usklađena sa socijalnim partnerima, a da će se više pažnje posvetiti Uredbi o mjerama finansijske pomoći privatnim poslodavcima, obrtima i ostalim samostalnim djelatnostima u Federaciji Bosne i Hercegovine u cilju održavanja radnih mjesta za 2025. godinu, s ciljem najboljih rješenja za sve zainteresirane strane.

2. a.

Na početku predstavljanja Uredbe o isplati pomoći radnicima od strane poslodavaca, Nermin Nikšić, član delegacije Vlade FBiH, kazao je da se prilikom pripreme iste vodilo računa o tome da se na najbolji način pomogne radnicima i poslodavcima. Pored toga, istakao je da će navedena Uredba važiti do 31.07.2025. godine, a razlog jeste plan Vlade Federacije BiH da se do navedenog datuma donese Zakon o fiskalizaciji transakcija u Federaciji BiH i Zakon o izmjenama zakona o doprinosima. Naglasio je da koliko se ne uspije u donošenju navedenih zakona, po istoj metodologiji pristupit će se produženju važenja ove Uredbe.

Ovom uredbom poslodavcima je omogućeno da svojim radnicima isplate mjesečnu pomoć, a propisano je pravo na isplatu pomoći radnicima od strane poslodavca, dinamika i visina isplate, kao i način realizacije. Poslodavac može, na osnovu ove uredbe, izvršiti isplatu pomoći svojim radnicima do 450,00 KM mjesečno a sve u skladu sa finansijskim mogućnostima i pravilima propisanim ovom uredbom. Također, poslodavac može izvršiti isplatu pomoći radniku u različitim iznosima i u iznosu koji je manji od ovog iznosa.

Nakon uvodnog izlaganja Nermina Nikšića, predsjednik ESV-a je otvorio raspravu po ovoj tački Dnevnog reda.

Za riječ se javio Adnan Smailbegović, član delegacije Udruženja poslodavaca u Federaciji BiH, koji je istakao da ima primjedbu na rok važenja uredbe, odnosno da smatra da bi rok važenja Uredbe prema njegovom mišljenju trebao da važi za cijelu 2025. godinu.

Pored imenovanog, u raspravu se uključila i Snježana Köpruner, član delegacije Udruženja poslodavaca FBiH, koja je iznijela zahtjev u pogledu potrebe za određenom pomoći za poslodavce koji se bave izvozom, s obzirom na to da bilježe pad prihoda i do 20% od mjeseca novembra 2024. godine.

Za riječ se javio i Mevludin Bektić, član delegacije Sindikata, koji je prije svega izrazio nezadovoljstvo zbog neblagovremeno dostavljenih materijala za razmatranje, te je pored navedenog, napomenuo da smatra da će navedena Uredba donijeti određene negativne efekte.

Nakon iznesenih stavova od strane imenovanih, Nermin Nikšić, član delegacije Vlade FBiH, ponovio je da Vlada FBiH ima namjeru do kraja sedmog mjeseca tekuće godine, donijeti određene propise, a ako se isto ne uspije, važenje Uredbe će se svakako produžiti. Na izlaganje Snježana Köpruner, člana delegacije Udruženja poslodavaca FBiH, Nermin Nikšić, je izjavio da Vlada svakodnevno radi na pronalasku najboljih mogućih rješenja, te da će u svakom konkretnom slučaju saslušati sve prijedloge i donijeti najbolja rješenja.

Dalje se u raspravu uključio i Selvedin Šatorović, član delegacije Sindikata, koji je u svom izlaganju pohvalio korake Vlade u donošenju ovakvih rješenja, te podržao rok važenja Uredbe.

Vojin Mijatović i Kemal Hrnjić, članovi delegacije Vlade FBiH, također su se uključili u raspravu, te iznijeli stavove u pogledu hrabrih poteza Vlade FBiH koji se odnose na povećanje minimalne plate, kao i donošenja pravnih akta kojima će se pomoći i radnicima i poslodavcima usljed brojnih izazova u poslovnom svijetu.

U raspravu se uključio i Fikret Alić, član delegacije Sindikata, te izjavio da stav Mevludina Bektića, nije stav Sindikata, te je podržao sve korake u pogledu svake vrste pomoći koja će donijeti olakšano poslovanje poslodavcima i pomoć radnicima.

Mario Nenadić, član delegacije Udruženja poslodavaca u Federaciji BiH, zahvalio se članovima Vlade FBiH koji su radili na ovim rješenjima.

2. b.

Predsjednik ESV-a dao je riječ Nerminu Nikšiću, premijeru FBiH, kako bi dao uvodne napomene i kako bi predstavio drugi akt Vlade FBiH, odnosno Uredbu o mjerama finansijske pomoći privatnim poslodavcima, obrtima i ostalim samostalnim djelatnostima u Federaciji Bosne i Hercegovine u cilju održavanja radnih mjesta za 2025. godinu. Nermin Nikšić je istakao, da se ovom uredbom uređuju uslovi za dodjelu finansijske pomoći, način dodjele, analiza efekata, kao i način izvještavanja. Dodjela finansijske pomoći se odnosi na refundaciju već isplaćenog dijela doprinosa za zaposlene radnike za period od 1.1.2025. godine do 31.12.2025. godine. Cilj dodjele finansijske pomoći je održivost korisnika, očuvanje postojećih radnih mjesta i osiguranje podrške likvidnosti za ovaj period. Ukupna finansijska sredstva za provedbu ove uredbe su osigurana u Budžetu FBiH za 2025. godinu na razdjelu Federalnog ministarstva razvoja, poduzetništva i obrta u iznosu od 100.000.000 KM. Imenovani je

također istakao da će se redovno pratiti realizacija dodjele ovih sredstava, te ukoliko bude bilo potrebe da će se po mogućnosti obezbijediti i dodatna sredstva.

Prilikom čitanja teksta Prijedloga Uredbe o mjerama finansijske pomoći privatnim poslodavcima, obrtima i ostalim samostalnim djelatnostima u Federaciji Bosne i Hercegovine u cilju održavanja radnih mjesta za 2025. godinu, dogovoreno je da ukoliko neko od članova delegacija ESV-a smatra neko od poglavlja ili za neku od odredbe da je sporna, da se mogu uključiti u raspravu odmah po čitanju istih.

S tim u vezi, za riječ se javio Adnan Smailbegović, član delegacije Udruženja poslodavaca u Federaciji BiH, koji je istakao da smatra da je potrebno da se precizira da se navedena Uredba odnosi na poslodavce, tj. da se ne precizira koje poslodavce, a da se drugim odredbama definišu dodatni uvjeti.

Za riječ su se javili Nermin Nikšić i Vojin Mijatović, koji su istakli da s obzirom na to da postoje limitirana sredstva za ovu namjenu, Vlada FBiH je planirala da se Uredba odnosi samo na privatne poslodavce, a nikako za javna preduzeća, te prateći izlaganje Adnana Smailbegovića, također su se referisali na izjavu da se Uredba treba odnositi i na velika preduzeća, gdje su izjavili da postoji problem da se Uredba odnosi na velika preduzeća, ali da se ovaj problem možda može prevazići ukoliko se propiše uvjet od 6.500 KM zarade po svakom zaposlenom, te neki drugi uvjeti.

U daljnjem čitanju teksta, također je došlo do određenih razilaženja u mišljenjima članova delegacija ESV, a što je relativno usaglašeno, te je uzimajući u obzir različita tumačenja i potrebe socijalnih partnera, postignut dogovor da će članovi Vlade uzeti sva mišljenja u razmatranje, te pokušati u toku dana pripremiti finalnu verziju navedene Uredbe, i istu prosljediti socijalnim partnerima na mišljenje, kako bi se u što skorijem period ista donijela i počela primjenjivati.

Prilikom rasprave, članovi delegacija su se dotakli i minimalne plate za industrije tekstila, kože i obuće, te je Mirjana Vučić, pomoćnica federalnog ministra finansija, pojasnila da ne postoji zakonski osnov za manju platu u odnosu na onu koja je utvrđena Odlukom o minimalnoj plati za 2025. godinu, te da će se dodatno tražiti rješenje za ove poslodavce i radnike koji su zaposleni u navedenoj industriji, s obzirom na to da se navedenom Uredbom ne može napraviti izuzetak.

U raspravi po ovoj tački dnevnog reda još su učestvovali: Berislav Babić, Snježana Köpruner, Selvedin Šatorović, Adnan Smailbegović, Fikret Alić, i dr.

Nakon zaključene rasprave, o ovoj tački dnevnog reda, predsjednik ESV, predložio je donošenje sljedećih zaključaka:

- Ekonomsko-socijalno vijeće za teritoriju Federacije BiH podržava donošenje Uredbe o isplati pomoći usljed ublažavanja posljedica povećanja troškova života;
- Ekonomsko-socijalno vijeće za teritoriju Federacije BiH podržava donošenje Uredbe o mjerama finansijske pomoći privatnim poslodavcima, obrtima i ostalim samostalnim djelatnostima u Federaciji Bosne i Hercegovine u cilju održavanja radnih mjesta za 2025. godinu, na bazi vođene diskusija, razmjene mišljenja i utvrđenih prijedloga tokom sjednice ESV-a.

Nakon iznesenih prijedloga, predsjednik ESV je dao na glasanje prijedlog istih. Delegacije su glasale, nakon čega je predsjednik ESV konstatovao da su predloženi zaključci jednoglasno usvojeni, te da isti imaju saglasnost ESV.

Ad.3

U okviru ove tačke dnevnog reda, predsjednik ESV-a predložio je održavanje tematske sjednice kada su u pitanju Zakon o posredovanju u zapošljavanju i socijalnoj sigurnosti nezaposlenih osoba, Zakon o zapošljavanju stranaca i Zakon o radu, te da se prilikom održavanja iste pozovu predstavnici akademske zajednice, službi za zapošljavanje, nadležnih ministarstava i dr.

Za riječ se javio Vojin Mijatović, koji je izjavio da su navedeni zakoni u nacrtima, i da će se u narednom periodu održavati javne rasprave, a da će se kad prođu javne rasprave, razmatrati prijedlozi ovih zakona na sjednici Ekonomsko-socijalnog vijeća za teritoriju FBiH, te da ESV treba da raspravlja o zvaničnom prijedlogu, a ne o nacrtima. U raspravu se uključio i Adnan Delić, član delegacije Vlade FBiH, te naglasio da su u pripremi navedenih zakona učestvovali svi socijalni partneri, od predstavnika poslodavaca, sindikata, predstavnika porezne uprave, nevladinih organizacija i dr. Također, imenovani je izjavio da su prilikom izrade radne verzije Zakona o radu, bili uključeni svi relevantni nadležni organi, te da će Federalno ministarstvo rada i socijalne politike narednom periodu objaviti radnu verziju Zakona o radu na zvaničnoj web stranici Ministarstva, i da će sve zainteresirane strane imati priliku da dostave svoje prijedloge i mišljenja.

Predsjednik ESV zaključio je da će razmisliti o navedenom i eventualno zakazati tematsku sjednicu na ovu temu.

U okviru ove tačke javio se i Adnan Smailbegović, koji je delegacijama uručio dva akta koji se odnose na Stav predstavnika poslodavaca u ESV za sjednicu zakazanu za 03.02.2025. godine, te akt „Zahtjev za stavljanje van snage uredbi o minimalnoj plati“ upućen od strane Grupe privrednika.

Na kraju sjednice, zajednički stav je bio da se u ime Ekonomsko-socijalnog vijeća predstavnicima medija, obrate Safudin Čengić kao predsjednik ESV, te predsjednici delegacija u ESV Nermin Nikšić, Fikret Alić i Adnan Smailbegović.

Sjednica Ekonomsko - socijalnog vijeća završena je u 13:00 sati.

PREDSJEDNIK

Dr.sc. Safudin Čengić

Zapisnik sačinila:

Zijada Karamović